

四庫全書

集部

欽定四庫全書

集部

東萊集卷十三

詳校官庶吉士臣龍廷槐

主事臣呂雲棟覆勘

總校官知縣臣楊懋珩

校對官中書臣范鏊

謄錄監生臣桑英

欽定四庫全書

東萊集卷十三

宋 呂祖謙 撰

墓誌銘

張監鎮墓誌銘

乾道五年信安張杰赴於其友呂某曰先君以七月二十五日棄諸孤敢告于執事某既與使者為禮即辦裝粵十月二日會其葬於衢之西安縣靖安鄉九龍山已下杰拜且哭曰先君之葬也遽未有辭以識諸幽將惟

子是屬授以汴人趙焯行狀一通某再拜興受退而于役于仕于喪于疾棲置筆研未克具藁杰以書趣曰已丑之會吾子嘗墜言焉今墓木之葉七易矣吾子獨無意乎某矍然驚謝乃序而銘之君諱淑堅字正卿其先自開封遷于衡曾祖智全尚書都官郎中祖詠考彥琦君蚤嚮意文學雖以季父任為承信郎年餘四十足未嘗至吏部門研索典籍矻矻如諸生周覽旁泱星厯方齊篆籀之屬無所不窺浮湛里閭遇疾痛呻吟者或和

藥飲之隨失其疾世醫莫能識其節度謁者浸衆君悠然應之不為彼此薄厚也晚歲始出監信州泂口鎮鎮居往來之衝設額夥甚前政數負鍛君通商平酤經入

用登

闕

官漕卒將輸如織頡頏侵越鎮官素不飽

闕

至道鎮境者皆抑首屏氣無敢譁庀局甫四

月卒官下鎮民相與負其樞還衢其孤強之儼直委去不顧蓋君於是年四十有八官止承節郎有詩書解合三十卷始君程督諸子誦肄蚤夜不置已而長子策名

人意其繩約當少寬君所以訓厲之者益峻甚於他子  
然則君之期其子其諸異乎人之期者矣娶葉氏三子  
杰迪功郎寧國府府學教授次臯次興一女適袁煥銘  
曰

緩已之進匪辰之競急人之憂匪藝之羞期子之大匪  
勝之急不怠其昌視此石章

金華時君德懋墓誌銘

隆興改元天子賜進士第於廷東陽郡登名者十有八

人時鑄呂某皆在選中淳熙二年四月丙辰鑄執父喪  
某往弔焉鑄拜稽顙哭且請曰吾父劬躬教子里人莫  
不聞鑄也甫得一官以養閱日未久吾父遽大棄之所  
以忍死須臾者惟楸枰窀穸之事不克終是懼子幸哀  
而賜之銘以卒相鑄也某辭不受命退考其譜牒其先  
蓋開封人五季之亂始自占於金華君汝功字德懋曾  
祖則祖理考煥其君生而惇質亡遨逸浮習之靡宣和  
中盜發青溪兵鋒所及人自求生至親或不相保君纔

十餘歲已能從其父母崎嶇兵間扶攜負挈跬步不失左右見者異焉稍長奪於家事不得日對編簡慙然常若不滿中年乃築室買書飭厲其子不少置已而鑄以命服拜堂下賀者塞門咸曰此善人之報也久之鑄尉鄂之嘉魚戒板輿請君俱君曰吾幸有先人故田廬朝嫺暮戚足以自娛行矣守汝身庀汝職無干官常以為吾憂復曰湖外奉入薄吾且損伏臘調度以佐汝費其勿以衣食自累君之過其子它皆類此於兄弟尤篤晚



歲哭其仲弟過時而哀不衰以至輯柔宗姓承寧鄉鄰  
逢迎舊故率用和厚內外無違言其終也享年六十有  
八娶邵氏三子長曰鑑次則鑄今為從政郎新隆興府  
南昌縣丞季曰鎮三女長適邵澄次適汪旦季適邵庚  
孫男曰瀾道濟梁潛君沒之明年十二月甲申葬于縣  
之惠日鄉九里原銘曰

十年之計侯杞侯梓百年之計則惟孫子廟鼎之陳有  
祿自天嗣德不怠尚封其阡

宋郴州墓誌銘

朝奉郎主管台州崇道觀宋公諱有字子華以淳熙四年正月丁卯卒于婺之里第五月壬寅葬于赤松鄉糝嶺原其孤以迪功郎監潭州南嶽廟劉嶠狀來謁銘去年秋某與公別愀然忽以死事見付時公寢食固自如也嗚呼孰知未半歲而竟銘公乎銘曰

睦來之宋版于金華以農相傳黃壁之穴八世曰正始厭耒耜相近郊城西是家九世曰裕繫公禰廟逮公

之幼載教載詔養雖弗洎光遠有輝以朝大夫即第而告公初筮學幫寇叛天號擗兵間家旤之延靖康建炎遘遘屬連策士如林公往參焉有離有合有逢有悟晚名一官主善化簿潭大都會運艘所翰阨於侵牟或繫其孥慨然建白弊剔患祛賊荼黃七橫行里閭乘吏情媮培癰護疽亟填牢戶良民用蘇鹽官在溫司倉是徒勛躬勤事陵儲阜待江夏龍泉間劇異施公宰兩邦左右具宜陪貳于潭舊所習知闔府誦嘆不見瑕疵千里

上游郴古分郡帝心遠民俾公往鎮閉閣無為臨以清  
靜年至而歸上還符印乃脂我車我車我徒乃行我田  
我田我廬社臘逢迎共相嬉娛齒八十一壽則有餘厥  
配杜嬪前歸其墟長子維泌實嗣宗職沆也蚤亡孫數  
則七九齡既天甿林角立朋行弼珏長幼秩秩女孫之  
伯壻蔣端蓋仲季叔倪其二在室施于曾孫男一女一  
維松有鄉維糝有宮維窆有石系載初終

附芮氏誌

夫人芮氏吳興先生之季女東萊呂某之繼室也生十有一年而先生沒及長澹靜馴飭母王夫人隆愛之嚴於擇對不輕諾某少獲事諸公長者而海內知心則實惟先生之門夙夜念無以酬適中饋乏主聞夫人之賢乃委幣以請既廟見慨然曰吾他日有以拜先生墓矣歸之明年某病廢夫人護視劬瘁得羸疾以卒曾祖寧祖彥輔贈朝議大夫先生諱煜終右文殿修撰夫人生以紹興三十二年九月五日卒以淳熙六年七月二十

八日是年九月十五日祔於婺州武義縣明招山先君兆域之左

潘叔度妻朱夫人墓誌銘

吾同年友潘叔度景憲有賢配曰桐鄉朱氏始叔度謀繼室習於朱氏者皆稱夫人之賢及歸踐婦職過所聞叔度自律甚嚴人少當其意夫人獨事之順焉其於子若女叔度不獨咨美其均壹又每咎其厚於慈也既沒自尊章至于娣姒哭之過時而哀中外有連者皆惋嘆

失聲或涕泣不能已也生二十七年而嫁嫁七年而卒  
實淳熙己亥七月十九日是歲十一月七日葬於婺州  
金華縣葉山曾祖康贈朝議大夫祖載上司農卿贈徽  
猷閣待制父翌中書舍人終敷文閣待制子男二人自  
厚自晦子女子三人長適朱塾餘在室子與叔度共學  
久矣其兢兢於母子昆弟之間如恐傷之者蓋深知其  
所存故其得內助則竊為之喜迨其悼亡見其用力之  
難而私憂其失其相也雖病且廢忍不銘銘曰

匪偏匪頗匪嘻匪噉理從數違質厚氣薄厚焉培之薄  
焉委之我作斯銘允無媿辭

郭伯清墓誌銘

君諱澄字伯清姓郭氏婺之東陽人曾祖招祖知常父  
良臣將仕郎紹興末軍興入貲佐縣官者賜爵視任子  
將仕以伯清名上補迪功郎調隆興府南昌縣主簿再  
調台州黃巖縣主簿皆不行嘗請兩浙轉運司解亦終  
不遂淳熙六年八月十二日以疾卒年始三十娶朝奉



郎江南東路轉運司主管文字吳良驥之女後七十有九日亦卒七年十二月初六日合祔於羅青原將仕墓之左三子曰木曰紹曰愛伯清少時將仕奇其敏悟為築西園舍旁延名士講授鄉之秀民願請業者悉聚而館焉伯清既用力于學益知師友之可親辭氣悃款未嘗不以善其身迪其族衣被其鄉閭為主退而驗其語隨其力之所至皆有以自見識者始竦然不敢以內交要譽期之歲嘗大侵鄉人有不忍高其糴以牟利者問

之則曰此吾在西園所講也於是又知伯清之志非特  
信於朋友且有從而化者矣將仕沒里閭意伯清書生  
易與睥睨者甚衆毋楊夫人亦憂之及蒞家政物情土  
俗洞見表裏而一本於厚環田廬四旁悍者馴媚者弭  
無有嘗以事者既服其能而重感其意也平生所聞於  
師友者方將次第出之而伯清則死矣予每患學者頗  
固而窒於用才如伯清乃遽奪之不得極其所如往予  
非特為郭氏惜也伯清死今期年往來者皆道西園弦

誦之聲不衰兄弟朋友相厲以學若有督趣之者曰吾  
伯清不可負也嗚呼是豈聲音笑貌所能為哉予之知  
伯清蓋有不盡者矣銘曰

西園之木與日升兮維予之植衆所馮兮西園之木與  
歲老兮維予之志神所保兮

陸先生墓誌銘

陸氏出媯姓陳公子敬仲適齊別其氏為田田氏有國  
宣王封其少子通於平原陸鄉又別其氏為陸五代末

有占名數撫之金谿者曰德遷蓋唐乾寧宰相希聲之孫也德遷生有祥有祥生演演生戩戩生居士賀以學行為里人所宗有子六人先生諱九齡字子壽於次為第五幼明悟端重十年喪母哀毀如成人少長補郡博士弟子員時秦丞相當國場屋無道程氏學者先生從故編得其說獨委心焉久之新博士且至聞其雅以魏晉放逸自許慨然嘆曰此非吾所願學也賦詩徑歸結茅舍傍講習兼晨夜不怠先生年猶未冠於取舍向背

已知所擇如此吏部郎襄陵許公忻直道清節在中朝  
名論甚高屏居臨川閉門少所賓接一見先生亟折輩  
行與深語恨相遇之晚他日許公起守邵陽思與先生  
游先生亦樂從其招凡治體之升降舊章之損益前聞  
人之律度軌轍每亹亹為先生言不厭所以屬之者厚  
矣既歸益大肆其力於學廣攬博咨深觀默養如是者  
蓋十餘年乃束書入太學太學知名士聞聲爭願交始  
則樂其可親久則知其可事屏所挾北面而稱弟子者

甚衆祭酒司業酌衆論舉以為學錄先之以身正之以漸行之以無事雖跌宕見鐫譙者退亦心服不知怨之所在焉登乾道五年進士第迪功郎桂陽軍軍學教授以母老道遠改調興國軍軍學教授地瀕大江民寒嗇罕游校官先生不以職閒自佚端桀矍肅衣冠如臨大衆勸綏引翼士方興於學而先生以家難去官矣服除調全州州學教授未上以疾終於家實淳熙七年九月戊寅享年四十有九母饒氏繼母鄧氏用光堯慶壽恩

封太孺人娶王氏知通州城之女而元豐左丞之曾孫也子艮之女二人皆幼是歲十二月甲申葬于鄉之萬石塘初居士潛德不試采司馬氏冠昏喪祭儀行之家至先生又繹先志而修明之晨昏伏臘奉盥請衽觴豆饔饔闔門干指男女以班各共其職儉而安莊而舒薄而均禮俗既成雋者不敢踔厲朴者有所據依順弟之風被於鄉社而聞於天下其儀節品式江西士大夫多能道之至於先生忠敬樂易優而柔之曲而暢之遂濟

登茲者則非言語形容之所及矣先生兄弟皆志古者  
學燕居從容講論道義閭閻衍衍和而不同伯仲之間  
自為師友雖先生所以成德其資取者非一端然家庭  
追琢封植之功與為多焉休暇則與子弟適場圃習射  
曰是固男子之事也自是里中士始不敢鄙弓矢為武  
夫末藝歲惡多剝劫或欲睥睨垣牆曹耦必搖手相戒  
是家射多命中毋取死故獨無犬吠之警廬陵嘗有茶  
寇聲搖旁郡聚落皆入保並舍民走郡請先生主之郡



如其請門人多不悅先生曰古者比閭之長卽五兩之率也士而耻此則豪俠武斷者專之矣今文移動以軍興從事郡縣欲事之集勢必假借主者彼乘是取必於里閭亦何所不至哉寇雖不入境閑習屯禦皆可為後法其在興國學廩名存實亡簿書漫漶不可考先生為覈實催理受輸之法白郡授有司行之科條簡明士得其養凡經世之務職分所當知者未有聞而不講講而不究此一二條特因事而見者耳先生和順不違物而

非意自不能干簡直不徇人而與居久益有味四方學者踵門請益羣疑塞會糾纏轆轤雖善辨者不能解先生從容啓告莫不渙然失其疑而退非惟動悟乎格固有所本亦其用力於自治者既專且久人之痰疾皆嘗折肱浮湛滑濇適中其病聽之者於其心有戚戚焉至于扞格不入必寬養以俟其可未嘗無益而雜施之也天下之治方術者多矣囿於異端小道者既不足與議晚進新學間有聞君子之餘論者又多既其文而不既

其實摹規而畫圓擬矩而作方雖或似之而卒非也方先生勇於求道之時憤悻直前蓋有不由階序者矣然其所志者大所據者實有肯綮阻之雖積九仞之功不敢遂有毫釐之偏雖立萬夫之表不敢安公聽並觀却立四顧弗造於至平至粹之地弗措也屬續之夕與其昆弟語猶以天下學術人才為念少焉正臥整衣衾理鬚髯恬然而終所謂仁以為己任死而後已者蓋於此見之荊州牧廣漢張公枻與先生不相識晚歲還書相

與講學問大端期以世道之重無幾何而張公沒又半  
歲而先生下世矣豈道之顯晦果有數存乎其間邪雖  
然來者無窮而義理之在人心者不可泯也先生之志  
必有嗣之者矣葬有日其友呂某為銘二十九字識其  
寔曰

自古皆有死盡其道而終者幾希是維宋陸先生之墓  
百世之下尚永保之

鄱陽王安母程氏墓誌銘

自予病廢退居婺之金華杜門謝客嫺戚哀其羸而重  
於數勞之也亦罕過之今年春大雪十日窮巷無行者  
午睡起聞啄剥聲顧童奴曰是必有異趣視之往應門  
則曰是東萊呂氏乎啓闕以謁入曰鄱陽袁子王安予  
亟扶曳與為禮且拜且泣曰安不幸喪母不自意忍死  
圖大事既斬板矣又不自量欲傳載吾母之德善以紓  
罔極之痛用敢請于家君聚糧趼足自歸于門下予感  
然曰子於親則篤矣以某之罷情尚無以自見於今世

屬以千載不朽之託則非其人手足攣痺三歲于茲彊以冶金伐石之事則非其時不寧惟是婦人名不出閭而墓之有碑蓋漢氏之末造也子苟尚志飭身使後世知有子姓名為之親者斯不泯矣何以文為則又泣數行下曰先生之教既聞命矣抑中心有不能自己者敢試陳之安之家聚口衆度伏臘堇堇耳吾母佐吾父縮衣節食聘士教子塾師姜君慶貧甚獨與二女居吾母親為拊養已而皆資遣之姜君有消渴疾每講罷索巨

觥引滿如奉漏甕沃焦釜少遼緩則殆不濟閱數年吾  
母終無倦色鄱陽士鄉也安之椎鈍而有司兩寘之貢  
籍閭巷之人皆為王氏賀吾母獨未以為足安未敢以  
是為報也三十年間齷齪拘畏雖無能短長鄉之長者  
以其不叛於士檢稍稍遣子弟從安游安始少自慰而  
吾母則亡矣苟免喪猶視息於人間固不敢自畫以負  
吾母之意道遠年徂懼不克濟先生幸賜之言此志豈  
不益可保予矍然曰子之志及此豈敢以疾病為解考

其家世本末孺人姓程氏饒之德興人曾祖守益祖萬父棫適同邑王君彥暉淳熙三年天子稱觴德壽宮賜高年者爵孺人實始封後三年十月二十六日以疾卒子男子四人長賓次安次憲次宗子女子二人皆已嫁而卒孫男女十二人十二月六日葬于縣之唐原又明年二月乃表其墓又為銘遺之曰

藐是吾身吾親之枝可舟可梁榦者百圍死事皇皇生事業業母俾斯文獨有枝葉



金華游玠母陳氏墓誌銘

出赤松門十二里並驛道得支徑右折而南岡阜迤邐  
相屬行三里許至後湖之原有墓焉是為郡貢士陳敏  
之女迪功郎致仕游夔之妻迪功郎新澧州州學教授  
玠之母生十有七年歸游氏又四十一年以疾卒實淳  
熙七年十二月二日其葬以明年四月四日男五人長  
即玠也次璞次璣次珙次瑀女三人長適鍾麟次適汪  
知古幼在室前葬玠奉贄幣請曰玠之母本儒家方三

舍法行時郡以外祖充賦貧不能上道竟老於布衣吾母常恨之故相家君教諸子尤力玠每游學紉補炮烹米鹽靡密悉出吾母之手甫得一官未及致鍾釜之養而遽悼棄之鄰里莫不為玠酸鼻而玠之焚獨則人有不及知者焉建安之游唐德宗世有別居邵武者入國朝枝葉益蕃獨玠之系無仕者崇寧中吾祖輿母隄嶺徙名數於婺之金華今七十有八年矣玠既賜第家君誨之曰汝曾祖以上兆域皆在邵武汝祖歲或一再往

省焉汝諸父雖不及汝祖之數猶間往省焉自吾之老不能蒙霜露犯寒暑以問訊松楸然每往來吾心也汝幸免於課試之累盍趣裝代吾行玠再拜受命比還吾母已屬疾且喜且勞曰吾兒始識先世丘壠矣跋涉無恙乎改月遂至大故治湯液護衾裯之日視諸弟為獨少此玠終天之恨也祖墓岸城濠湫隘無以族昭穆乃卜地於城之東婦人無外事法不當有銘然玠不孝之罪上通於天一旦殞滅諸弟稚昧未勝灑掃之職將不

瞑目於地下矣願先生哀而識之予告之曰子之家常  
如今日雖八百里之邵武不知其遠况十餘里之後湖  
乎苟其不然則負城之阡猶可憂也子盍反其本矣銘  
曰

北門之池蔽芾其陰東門之原封之自今我圖其新而  
舊勿替勿替引之維昭武是視

金華時灃母陳氏墓誌銘

大司徒以本俗六安萬民初一日媼宮室次二曰族墳

墓是維死生之大紀三代相傳而不變者也居焉而父子有秩兆焉而昭穆有班奇衰譎怪之說未嘗出於其間斯民之生老壽蕃祉繫族以宗名官以氏至于千百年而不替王政既息舉丘封竈窆之柄委之巫史妖誕相承誘怵並作民始忍以啜粥飲水之時起射名干利之望窀穸所卜畔經遠祖度越疆畛孤峙數舍之外服降屬疏蓋有樵牧不禁者矣甚者兄弟忿鬪或謂是山於伯獨吉或謂是水於季獨凶孤疑相仗暴其親之遺

骨而不可檢是可哀也已學士大夫慨然尚論先王之制則世共譁以為闊於人情予獨於陳夫人之葬有感焉夫人生於壺幃之中組紉是習饁饋是共未嘗親接儒先之餘論也病革屬其子曰必祔我先舅之傍毋深徇葬師以拂我志遂攻位於舅之東墓白楊塢然則墳墓之族實人情之至願當巫史紛若之際猶有不讀周官暗與之合者禮豈彊人者哉故予樂道夫人之事而論次之夫人諱瓌曾祖某祖某父某男四女一孫男二

時氏金華右族舅沒姑老夫人以冢婦傳家閨門千指  
無違言每與其夫語必曰先舅無恙時賓禮髦峻課督  
其諸孫孫為如何君主其外我主其內毋使一事減於  
舊可也其子見里有藏書者歸有羨色夫人出簪珥直  
數十萬俾為僦工費且曰吾家非窮空也特欲汝曹異  
日見此書不忘吾此意耳夫人沒後諸子為予誦之輒  
涕下不能禁庶幾有成其志者銘曰

葬書五車重折軸微祥畏機墓不族淑哉夫人見何獨

續息留言毋遠卜有欲踵之求其躅皇舅之原原左麓

東萊集卷十三



欽定四庫全書

東萊集卷十四

宋 呂祖謙 撰

傳

東萊公家傳

呂氏系出神農受氏虞夏之間更商周秦漢魏晉下逮  
隋唐或封或絕五代之際始號其族為三院言河南者  
本後唐戶部侍郎夢奇言幽州者本晉兵部侍郎琦言  
汲郡者本周戶部侍郎咸休其昭穆疏戚世遠軼其譜

而河南者祖為最盛河南之呂入國朝有為起居郎知  
泗州者曰龜圖生蒙正相太宗真宗謚文穆起居之弟  
曰龜祥嘗為殿中丞知壽州壽州生蒙亨終大理寺丞  
寺丞生夷簡三相仁宗與文穆仍以公開號於許冊拜  
太尉就第薨謚文靖配享仁宗廟廷文靖公有子五而  
二至相輔公弼事英宗神宗為樞密使謚惠穆公著事  
神宗哲宗歷樞密副使門下侍郎尚書左僕射司空平  
章軍國事申國公謚正獻蓋其自獻公而上勲德行治

皆在太史氏正獻公三子伯曰希哲以經入侍哲宗崇政殿封滎陽子是實生公用公貴贈太子太保公諱好問字舜徒滎陽公之冢子也生數年以門功守將作監主簿委已於學髫髻童習不屏而絕范蜀公鎮與正獻公兄弟交公幼拜蜀公於堂唯諾進趨無違禮蜀公慰納甚備待之如成人吳侍講安詩至伉簡少許可每見公輒自失嘆曰呂氏有子矣稍長學益成行益修諸公長者皆折輩行從公游初監在京雜賣場正獻公當國

在事者以公親宰相孫闕其條約不以簿領累公公愈益自厲明夜治文書若有程督之者哲宗皇帝同宣仁聖烈皇后聽政以樸素先天下四方貢獻一歸之有司斥賣以佐經費吏或下其估以自私公獨漠然如不見終秩未嘗售一物正獻公薨天子加恩諸孫將擢公寺監丞公固辭推以與從父兄徙監金耀門文書庫職閒無事公所樂也始得大肆力於經術忘晦明寒暑之變當是時正獻公賓客半朝廷爭欲致公稍自降屈出一

語則躋臺躡省唯自擇公深自晦匿日與碩師鴻生講  
道窮巷中未嘗掛謁刺於權門之籍時論歸其靖退調  
真州春料船場黨事起滎陽公謫和州公自免歸徽宗  
皇帝即位號召耆艾皆集闕下滎陽公入為祕書少監  
公以便親監在京綾錦院崇寧初權臣修元祐之怨治  
黨錮甚急羣譴輩黜廷中為空於是滎陽公廢居宿州  
公亦以元祐子弟例不得至京師兩監東獄廟客於宿  
者七年自正獻公時悉稟賜以振宗族無留貲其後再

更黨禍家愈寔或日盱竈薪不屬公上奉二親下任數  
百指之責從容養志奏甘毳娛顏色米鹽之問不至寢  
門而家人亦化公德怡怡然忘其貧復調真州春料船  
場司揚州儀曹事揚據南北衝賢士大夫舟車上下必  
過公而拜滎陽公於堂如楊侍郎時中立陳右司瓘瑩  
中每過揚與公語連日夜不厭所言皆經世大畧揚帥  
蔡卞自知不為公論所右欲拔善類自解待公特異拜  
疏薦公於朝公以禮自持卞終不得而親久之卞自揚

得政同府掾屬拔擢略盡獨公滯於故官卞遣其黨誅  
公以利曰子少答我公即坐階顯列矣公笑不應遭內  
外艱終制無復仕進意客潁昌之陽翟者又十二年卷  
道環堵闕光韜華咤焉與世忘然譽望日尊賢臨一時  
宣和之季故老踵相躡下世獨公與楊公中立無恙諸  
儒為之語曰南有楊中立北有呂舜徒蓋天下倚以任  
此道者唯二公云未幾金人稱兵徽祖傳位皇太子是  
為欽宗皇帝靖康元年正月敵騎薄都城乞盟而歸天

子銳欲更置天下事寤寐駿良近臣交口薦公欽宗雅聞公名趣召公驛書道相及未至除左司諫諫議大夫賜進士出身間兩月擢御史中丞始徽宗前內禪之二日下哀痛詔解散黨禁削除新法盡復祖宗之故郡國宣布詔書聽者至感泣然蔡京持權餘二十年黨戚根據內外皆害其事莫肯行欽宗雖屢敕有司亟如詔陽應而陰不隨毛舉一二事以塞責名更張而大抵猶蔡氏之舊公首為上言太上皇之詔時之利害政之闕失



無不備載縱使直言之士伸紙執筆得盡其言亦無以過於此矣今陛下雖有奉詔之名而未有行詔之實願陛下書太上皇之詔置於几間一一行之所以安宗廟定中國靖邊圉之策在此而已又言陛下宵衣旰食有求治之意發號施令有求治之言逮今半年所謂意者終未能行所謂言者終未能副蓋左右前後之人不能推廣盛德而陛下失於容養不能成之以剛也臣將見陛下淳厚之德變為頹靡之風矣又言陛下自即位以

來欲復祖宗之法然左右前後率多陰謀沮格必欲不行名為罷蔡京之法度而今所行者實蔡京之法度也名為去童貫之軍政而今所用者實童貫之軍政也何以言之祖宗之法既未復而所改所罷者何事斯民何以至今不被陛下之德澤也陛下若不革京貫等所為銷京貫等所引恐無由可致太平欽宗甚鄉納公新從下土來以孤身徧犯衆怨深探用事者包藏蒙蔽顧望之情披抉囊橐為上索言之小人自知情得皆異目視

公公勇不自恤奮筆益力累疏蔡京之惡投之海外且請摘朋附之尤者黜以厲其餘建白收王安石王爵以定名分正神宗配享以判忠邪褒表江公望張庭堅任伯雨龔夬以開諫爭刊青苗斂散之令以紓民力湔元符上書之譴以起士氣章前後數十上欽宗數對輔臣稱公論事有體嘗奏事直尚食進膳時公請退欽宗固留公畢其說漏下數刻乃罷其命公為中執法諭曰朕夜閱班簿廷臣無出卿右者且以卿元祐子孫使天下

知朕好惡眷矚日隆恩意禮秩羣臣莫敢望媚忌者寢  
多金人釋都城之圍也大臣意其不能再舉武備益弛  
軍書邊遽猶襲承平故態旬稽月留不得決語公拜言  
職之六日即言昨敵在闕要盟劫質志滿氣盈而歸益  
有輕中國心秋冬之間草枯馬肥能保其不傾國再來  
乎然則禦敵之備在今三數月之間而已日月如此之  
迫寇敵如此之大當速講求以備不虞又言邊事經畫  
晷刻可辦者率皆旬月不見施設臣僚奏請皆不行下

今敵人復有深入之意而區

闕

異於前日此臣

之所深懼也及秋敵騎驤驤南下大臣不知所出遣使  
講解冠蓋屬路不絕敵外相應答而攻城略地自如告  
急者日三四至諸將以和議皆閉壁不敢前公進言所  
謂講和不進兵者彼當頓兵境上不敢相侵然後朝廷  
亦勿進兵可也彼既欲和而攻我不已今日破一城明  
日破一縣朝廷猶執議和之說不謀進兵遣將臣恐比  
至得和河北諸城徧被其害矣今日之計和與不和皆

當為備有備無患條守禦之策甚悉如論防河非選將  
練卒倉猝必不可倚厚集滄滑邢相之戍以遏奔衝列  
勤王之師于畿邑以衛京城皆見抑厭不省居無何敵  
陷真定攻中山上下震駭大臣狐疑相杖以議和為解  
不為出師公率臺屬請對爭之劾大臣選懦誤國辭指  
痛切大臣怒請出公知袁州上內嘉公忠而不得已於  
大臣下遷公吏部侍郎既而敵騎臨河並河諸屯聞鼓  
聲鳥獸散無北向發一矢者敵徑渡遂壘都城下欽宗

悔不用公言進公兵部尚書閏十一月丙辰都城失守  
欽宗召公入禁中公晝夜不去上側軍民數萬譟譟斧  
左掖門求見上公從上御樓諭遣乃散衛士長蔣宣帥  
其徒數百露刃升祥曦殿邀乘輿犯圍西出左右奔竄  
獨公與孫公傳梅公執禮侍上蔣宣大聲曰前日宰相  
信任姦臣不用直言致國家如此孫公訶止之宣以語  
侵孫公公徐曉之曰汝數百人忘家族冒重圍衛上以  
出可謂忠義然乘輿將駕當相與物道途載糗糧具扉

屢無闕而後動宣詘服曰尚書真知軍情麾其徒退然  
衛士桀驁怙亂至坎宮垣盜禁帑珠玉無所忌公議以  
禁衛單寡為名召陝西將渠造以西兵五百補其缺造  
以兵入衛士皆迎自戢潛棄珠玉溝瀆或墜墻陰殿中  
復肅辛酉欽宗幸金營公實從十二月癸亥欽宗至自  
金營靖康二年正月庚子欽宗再幸金營公復從既駐  
蹕命公還都城慰拊既旬日聞北狩之議公悲憤廢寢  
食移有司請老孫公及簽書樞密院張公叔夜交止公



曰此尚書求退時耶傳輩與聞大政國家至此義當前  
死公闔門不出興復之責將誰屬語未卒公泣數行下  
曰某家世輔相非愛死而後國家恐能薄祗取辱耳二  
公命我以義我敢不聽苟利社稷死生以之二月丁卯  
徽宗皇帝幸金營壬申張公孫公將之金營與公決別  
南薰門慟哭握手相勉以忠義哀動行路觀者莫能仰  
視當是時二聖既幸金營太子諸王皆扈從無留者獨  
太上皇帝以大元帥康王總戎朔方內外隔絕莫知元

帥府所向人心危懼公遣客蔡安中省吏張思聰潛求康邸姻戚得韋淵蔣師愈又得給使孫卞郭貴於民間潛詢行府次舍以俟敵間元祐皇后自崇寧中復降居瑤華宮公在闕省具道本根所以誣罔狀請還位號欽

宗竦然曰當即出制耶公曰欽聖后臨朝既命位號以姑復婦名正體順崇寧詔書非道君雅意徒迫於蔡京輩耳陛下視元祐皇后伯母也今欲尊崇不當下制舉欽聖已行之命足矣欽宗然之初還自金營意金且退

闕 詔近臣豫定赦文公請首以復元祐皇后載於赦下

屬藁未布而敵情中變欽宗再幸金營矣后雖不克復  
然久處外宮名號不聞於外以是獲安公深維宗社之  
寄獨太上皇暨元祐皇后在日圖推奉之策敵既得志  
其衆皆思歸太宰張邦昌前使金為所質闕與俱來大

帥凡雅滿輩欲捐河以南委之邦昌而去公素不與邦昌  
接聞之憂甚造邦昌所善呂勤訪其為人勤曰公毋庸  
憂邦昌齷齪畏謹懦人耳公陰自喜曰吾事其濟乎三

月辛卯朔邦昌入居都省公說之曰相公之入為真欲立乎抑姑塞敵意而徐改圖乎邦昌驚曰是何言也在朝士大夫皆道君與上所擢若邦昌果有此意誰復見容公曰相公及此言非唯宗廟社稷之福亦相公家族之福也因從容道敵中事邦昌曰邦昌在危難滿軍誰何嚴急環床皆甲卒夜卧輾轉輒升床檢校公以言動之曰此敵情也相公知中國人情所向乎今日人情畏金人兵威耳金人既去復保人情如今日乎邦昌變色曰

然公曰金人言語不通本不敢有意中國特以契丹遺民讎夾攻之役而燕人之被遣者怨我納之死地合二憾以求逞於我故縱使金人以此至於此然大元帥在外人心有系元祐皇后在內敵復不知殆天力也相公雖勉塞敵意以紓難盍亟定還政復宗廟社稷之計則可轉禍為福邦昌曰此邦昌之心也公曰某所以不顧家族首建此議者以三世輔相當以復趙氏為已任願相公毋與好利者謀以亂視聽邦昌曰謹受教公退而傾

橐中裝募勇士李進持帛書走大元帥府進縋城徑重圍為候者所遮以善解說得免它日公復見邦昌曰相公權以濟事雖迫於彊敵當微示人以意邦昌曰奈何公曰省中非人臣所宜處盍寓直殿廬晨出毋令衛士俠陞敵所遺袍帶非戎人在旁弛勿服車駕既未還所下文書不當尚稱聖旨邦昌皆如公言邦昌又謂公曰舜徒賢德衆所推與今日欲安宗廟社稷非得公共事何以濟因請公攝門下省公始不肯當邦昌曰政府虛

位敵中遣腹心來據之將奈何公念肘腋間參以敵人  
且敗大事遂不復辭親黨或諗公宜闔門勿出公曰某  
身為世臣敢潔其身而忘國家大計乎公雖攝門下省  
止書兵部尚書銜日治兵部事自如同列誚之公曰受  
命於上不可改也卻奉祿不內以兵部印封其券至饘  
粥不繼鄰僧哀公之窮丐米遺公賴以少濟徐秉哲亟  
請邦昌改年曰不則敵人必大見猜公固爭得已然臺  
省文移畏敵不敢以靖康冠歲月公不能禁獨兵部符

檄仍稱靖康二年諸公聞之頗有效者吳玠莫儔請邦  
昌見金使於紫宸垂拱殿公曰二殿乃正衙其可耶玠  
曰既權宜攝政權宜御此殿亦何傷公曰相公左右皆  
宮省久吏驟見御正衙必憤駭以為即真變且不測邦  
昌矍然而止王時雍議肆赦公爭之數日不能得公曰  
赦書日行五百里今號令不出一城四壁之外皆非我  
有將誰赦邦昌笑曰俚語謂錢氏肆赦五百里外恐入  
李王世界公曰錢氏猶有數州地五代之際非素有君



臣之分豈今比耶邦昌悟遽追其赦公乘間語邦昌曰  
天命人心皆歸大元帥相公若先羣議之未啓遣人推  
戴則功無在相公右者若撫機不發則它人將有其功  
聲大義而來討悔可追耶邦昌曰非敢緩也兵戈蔽道  
將何塗之從公曰第預遣人俾軍民聞之雖未克行異  
時按遣人日月猶可自明不然豈惟相公不可自保某  
輩家族亦豈可保耶於是遣謝克家奉傳國寶往大元  
帥行府須敵退發金人還師有期邦昌將出別金人公

曰金人或留兵防衛何以處之邦昌曰恐不至此公曰不可不為之備若留兵則動息為所脅制釋位還政之謀皆不得展社稷危矣相公當以死爭逆順之分政在今日相公其勉之邦昌至敵營凡瑪哈果欲為邦昌置衛邦昌力辭翌日敵又遣高慶裔王訥來道留兵事公謂慶裔曰南北異宜恐北兵不習風土或不遵南方約束必不相安慶裔曰留一貝勒統之可也公曰時向熱貝勒貴人假如萬分一致疾則南方負罪益深慶裔曰諾

吾軍近在河北有變馳一騎見報則下鐵騎相援矣遂  
不復留兵四月庚辰朔金人中軍行辛酉金人後軍行  
壬戌金人掃地軍行公謂邦昌曰大事其可緩乎或曰  
敵去未久請俟踰年公怒曰踰一日已懼其遲儻城外  
推尊冊立則城中奈何邦昌曰彭寵之事安保其無舜  
徒所謂愛人以德者也或曰敵若回兵公能禦之乎公  
曰金人糾合諸蕃啗以中國之利故為金用今子女玉  
帛既厭其欲各思反其巢穴豈能刼而復南政使回戈

則死於宗社處死有名苟猶豫不亟決軍民有變吾屬必為所魚肉遺臭萬世矣邦昌從公策遣使詣大元帥府勸進請元祐太后垂簾聽政議已定邦昌下書乃尊后為宋太后公曰此事發端於予若云宋太后則人心疑懼矣吾不可預其禍亟在告卧家邦昌密使后姪孟忠厚持所上太后奏視公曰前日未敢正名出於畏偪非敢中變也公起見邦昌竟如初議甲子元祐太后入居延福宮乙丑羣臣見太后於延福宮太后泣羣臣亦

泣太后曰豈意國家遂至於此祖宗積德甚厚康王仁  
孝剛勇又何慮耶戊辰公趣邦昌歸政太后邦昌欲俟  
明日公曰時不可失遂以日晡集百官將校諭以太后  
垂簾迎大元帥入纂大統己巳邦昌易服歸太宰班出  
次資善堂庚午元祐太后自延福宮入拱宸門御小殿  
垂簾聽政公始議迎后或以為無益后之將就輿都人  
初聞蹕聲喜極皆嗚咽流涕塗經太廟父老童稚引首  
望廟垣驩呼鼓舞濤翻雷動闐衢溢陌異議者大訕服

建炎元年五月庚寅朔大元帥康王即皇帝位于南京  
大赦改元太后降手書以是日撤簾命公奉手書詣行  
在所慶登寶位癸巳次南都乙未賜對上勞公曰宗廟  
獲全皆卿之力也除尚書闕

秩中大夫封掖縣

男公感慨知遇為上深陳致亂之原講求故典期以歲  
月盡還祖宗之舊錄節義拔滯淹飭邊備大略粗舉李  
丞相綱夙敬公同在廟堂相得甚驩士大夫之在圍城  
者李丞相槩欲以叛逆罪之公曰王業艱難政舍垢納

汙之時遽繩以峻法懼者衆矣圍中士大夫責以不能死則可若直謂之叛逆彼豈無辭乎李丞相意不厭數遣其客胡瑄要說公區圍城人為三等以差行戮且曰必如是方可表公忠誼之節公謂瑄曰與君俱處城中衆以為可罪者纔十許人耳餘人本末吾輩所共悉寧可以叛逆加之耶由是李丞相始不快公矣時臺諫多李丞相所厚因論圍城事并以中公太上皇出手札付尚書曰呂某昨邦昌僭號之初即募人賫帛書具道京

城內外之事金人南退又遣人勸進考其心迹與餘人不同言官所不知仰尚書省行下公上章謝且力求去曰臣世受國恩異於衆人親受賢者之責所以不避敵人滅族之禍遣人冒園賫書於陛下畫謀奉迎向若敵人網羅得臣所遣之書而臣之謀畫萬一泄露臣之一身當如何臣之家族當如何然則臣果愛死耶果不敢愛死耶臣之心迹顯然明白臣今求退乃其時也乃初心也臣猶自以為當去况它人乎况言者乎章連上至



七八太上皇雖重惜公去而知公歸志確不可奪除資  
政殿學士知宣州時七月己酉也八月辛未公入辭賜  
茶便殿敦諭溫渥公下車之十日劇賊張遇聚徒數萬  
陷繁昌勢張甚聲搖江東公治城壁聯保甲遠斥候扼  
險隘賊望風震驚犬牙不入宣境明年三拜疏請祠詔  
提舉臨安府洞霄宮建炎三年冬祀進封東萊郡侯敵  
騎比歲大入江湖間羣盜蠡起公避地轉徙于筠于連  
于郴于全于桂靡有定止紹興元年七月丁酉以疾薨

于桂州享年六十有八訃聞詔贈五官卹禮視常典有加八月壬申藁葬于桂州城南之龍泉子男五人長本中嘗任中書舍人直學士院終於左朝奉郎提舉江州太平觀次揆中終於郊社齋郎次弼中嘗任駕部員外郎終於右朝請郎主管台州崇道觀次用中嘗任兵部員外郎終於右朝奉大夫主管台州崇道觀次忱中嘗任提舉江南東路常平茶鹽公事終於右朝奉郎知饒州女一人適右朝奉郎蔡興宗孫九人曰大器大倫大

猷大鳳大陽大同大麟大虬大興曾孫十六人曰祖謙  
祖仁祖儉祖恕祖重祖寬祖慤祖平祖新祖節祖憲祖  
永祖志祖慈祖義祖恣而大鳳大陽大同大興皆蚤夭  
公體氣高亮音吐洪暢衣冠甚嚴顧盼輝如也平生經  
籍之外無它嗜居陽翟年六十餘矣猶自課誦五經日  
終一秩晨起環庭除諷詠聲琅然雖少年有所不逮榮  
陽公道學為世宗公蚤得其傳樂天知命阨困湮鬱排  
抑詆挫無入而不自得晚歸朝廷遇大變兩陷敵營出


入白刃間左右喘汗無人色公裕然如平時諸帥爭前問公康王駐軍何地公曰名王貴人在國門外猶且不知況圍城中耶一帥怒目公曰尚書祇為趙氏乎公曰家世輔相實為趙氏聲淚俱墮時梅尚書執禮陳侍郎知質程侍郎振安給事扶以括責金帛不愜敵意駢首就戮中書高舍人伯振微服匿里舍為敵所族公正色抗對不少下旁立者代公縮頸故事誕節前期一月即浮屠老子祠祈祥會乾龍節有司脅於敵廢不講公獨

往景德寺之寶勝永慶院行禮是日金使在館公不顧  
其在桂林疾既革資政劉公珏訪公卧内公與劇談慷  
慨憂國言不及私迨至屬纊神閑氣定談笑而終公於  
死生禍福之際蓋如此靖康之難公含垢忍恥以就大  
計晚進後出不知前輩本末或以病公給事中胡公安  
國每為公辯且錄其語曰河間劉長歷丞相莘老之孫  
也來見曰諸人事邦昌者固不足論獨呂舜徒可惜余  
曰舜徒固自不同在圍城中遣人以蠟彈致元帥蓋累

朝輔相身為世臣同國休戚必欲復趙氏社稷故偷生  
忍死偽楚之朝幹正大事誘導邦昌使之歸宰相班勸  
進元帥皆其力也微斯人則邦昌外倚金人為重內有  
范瓊之兵王時雍馮澥李回等已為之用京師人不知  
世間有三綱但云得邦昌救其死命莫不德之占據都  
城呼吸羣小亦大索處置使舜徒死節第潔一身耳以  
此易彼故寧受汙辱以救大事四方士大夫聞公之薨  
以文致真紀公忠節者甚衆如御史中丞常公同則曰

京師之禍廟社傾隳公以一身扶顛持危安劉之業平  
勃難之丞相呂公頤浩丞相秦公檜則曰二聖未歸公  
不敢死竭力戴上以為天子胡公世大儒常公以風節  
聞其言皆世所取信呂秦二相亦身在兵間熟當時事  
者也紹興八年公長子舍人以臺劾罷語猶及公第四  
子兵部疏其誣辨於朝詔錄送史館於是公之大節始  
明於世公之薨也寇難未平葬故有闕後二十四年乃  
克改葬公於婺州武義縣之明招山實紹興二十四年

閏十二月己酉也惟公薨距今踰三紀言論風旨浸不傳於世謹叙次終始藏於家使子孫有攷焉



東萊集卷十四



欽定四庫全書

集部

東萊集卷十五

詳校官庶吉士<sub>臣</sub>龍廷槐

主事<sub>臣</sub>呂雲棟覆勘

總校官知縣<sub>臣</sub>楊懋珩

校對官中書<sub>臣</sub>范鏊

謄錄監生<sub>臣</sub>桑英

欽定四庫全書

東萊集卷十五

宋 呂祖謙 撰

紀事

入越錄

淳熙元年八月二十八日自金華與潘叔度為會稽之  
游辰後出旌孝門五里至關頭南折入會稽路二里桐  
樹嶺八里東藕塘城東陂塘此為大溉田甚博他時夏  
秋之交輒涸今歲雨澤以時田不印水秋深猶瀰漫也

十五里含香民居頗成聚落道旁野塘木芙蓉初發映  
水殊有思致十里義井五里上下倉十里孝順鎮十里  
自驛路北折入香山路五里宿杭慈潘氏莊凡行七十  
里是日凝陰不開風襲人已有力始御袂四山雲氣滃  
然岡巒出沒申後微雨夜遂大二十九日早冒雨行二  
里小鳳林寺涉溪屈曲稻塍間泥淖沒屨五里苦山二  
十里梅口邸舍蠲潔勝官道蓋行賈避義烏市征往往  
出此十五里香山林壑稍邃八里下稠巖景德寺寺崖

可百年繪事皆朴質飯于小軒方池叢竹皆有趣然稍  
蕪矣七里唐口自是復出驛路老梧離立道旁濯濯如  
青玉榦又二里宿逆旅凡行五十九里晡後雨方歇所  
歷大抵匆匆不能詳也三十日早發二里石斛橋溪流  
潺潺崖旁大石如屋橋西走浦江道也度橋而北十里  
石牛有樓臨路樓下牖戶亦明敞主人留小語云創以  
待使客非其居也所謂石牛者道下塘卧石若牛水滿  
不可見五里洞井居民依小坡植雞冠花數百本冠距

低昂大類尸鄉祝雞翁舍雲薄見日已而大霽十里新  
界自石斛橋道出兩山間少曠土至此山圍始寬秋稼  
極目黃雲蔚然過義烏東陽浦江永康四縣巡檢寨婺  
越界焉五里邵家灣觀五指山其巔石如駢拇然近視  
不若遠望飯民家舍後水竹可步逢驅羊行賈者數百  
蹄散漫川谷風毛沙肋頃有汧隴秋色五里涉楓江土  
俗諺云第一揚子江第二錢塘江第三楓江蓋甚言其  
水波惡實小溪耳聞春夏頗湍悍今僅至脛而已南岸

有覆斗山山形正方若斗覆五里興樂槿花夾道室廬  
籬落皆整五里界牌隴平坡淺草隱隱起伏環山城立  
真監牧地也五里牌頭市道分為兩北道出漁浦度浙  
江入杭東道入越輪蹄擔負東視北不能十一市傍斗  
子巖巖旁獅子山首昂背偃畧類狻猊五里寒熱阪五  
里宿硯石村凡行六十五里屢愒逆旅墻壁橫斜多市  
僧勝帖大要皆尤人語斯其所以為市道與悚然久之  
九月一日晨霧上橫隴東嶂出日金暈吞吐少焉金壁

徑升晃耀不可正視升數尺韜於雲絢采光麗因蔽益  
奇非浮翳所能揜露稻風葉皆鮮鮮有生意五里里湖  
五里蔡家塢五里桐木嶺五里諸暨縣入縣北門人煙  
猶蕭疎縣方築社南垣兩松樛枝小異里許至市自縣  
治前東折度下橋橋屋卑圯矣並大溪行流甚壯其源  
一自東陽一自浦江一自孝義至街亭合流逕縣城又  
逕蕭山浮橋入浙江縣東陶朱山頗雄自入新界已歸  
然見之出縣東門山益遠川原益曠田萊多荒蓋沮洳

不宜稼而然五里放生橋道左女貞新葉生黃綠間錯  
如行閩粵荔枝林五里馬秀才店店旁小室隨事蒔花  
草馬久罷舉矣三里雙橋畝二里烏石其南入剡百里  
而近十五里苦李橋溪磧頗清淺木陰扶疎百餘步入  
山徑五里至新店灣復得平地五里栗橋登栗嶺五里  
冷水望東嶺神祠縹渺雲間下坂稻穗垂黃際山數十  
里平鋪如拭洋洋乎富哉豐年之象道中所未見也五  
里宿楓橋鎮前歲析諸暨之十鄉即鎮為義安縣今年



五月廢凡行七十里薄暮小雨二日辨色發楓橋陰風  
薄寒十里乾溪溪橋櫟柳數百株有十圍者過橋繞山  
足行十里古博嶺嶺左右皆叢篠五里洪口有別徑入  
明自楓橋而上美竹佳樹相望近洪口曲折循小溪水  
聲瀼瀼風物漸佳十里含暉橋亭天章寺路口也遂穿  
松徑至寺寺蓋晉王羲之蘭亭山林秀潤氣象開敞寺  
右臂長岡達橋亭植以松檜疑人力所成者法堂後砌  
筒引水激高數尺堂後登堦四五十級有照堂兩旁脩

竹木犀盛開軒檻明潔又登二十餘級至方丈眼界頗闊寺右王右軍書堂庭下皆杉竹觀右軍遺像出書堂徑田間百餘步至曲水亭對鑿兩小池云是羲之鵝池墨池曲水乃汙渠蜿蜒若蚓必非流觴之舊斟酌當是寺前溪但歲久失其處耳由曲水亭穿小徑涉溪復出官道數里買舟泛鑑湖湖多堙為田所存僅如溪港然秋水平岸菰蒲青蒼會稽秦望雲門諸山互相映發城堞樓觀跨空入雲耳目應接不暇入水門過南堰歷府

學天慶觀至禹跡寺門捨舟外氏寓舍此寺拜外祖母  
溫國錢夫人伯舅叔舅溫國八十一矣氣貌視聽纔類  
五六十人與叔度同館於書室 三日游外氏園有梅坡  
月臺菊潭杞菊堂竹隱蒲澗橘洲因寺廢地葺治之十  
六七成矣最勝者梅坡遠亭皆梅前對蒲澗橘洲野水  
灣環島淑掩映如在江湖而竹隱一逕深幽堦庭清閤  
亦其次也又過義恩師院院與杞菊堂鄰十年前嘗識  
之午後自園後門穿僧庵度小橋轉三兩曲至圓通寺

舊乃興福寺子院去歲廢興福入圓通合二為一埽地  
更新面勢端直殿廡華敞殿後猶未畢工循舊路復穿  
園中歸園後邊河岸木成陰舅氏云此即蜀榿木也植  
之方數年往時表裏無障蔽今不復見道上車馬矣杜  
子美所謂飽聞榿木三年大信然是日薄陰 四日飯  
已侍伯舅同叔度詹李章徽之泛小舟出南堰繞城緣  
鑑湖訪蘇仁仲計議師德於偏門外皆前日初至所歷  
也闕 頗穩愜砌下瑞香兩

本面皆大餘仁仲蘇子容丞相孫致仕閒居年垂八十  
道前輩事亶亶不厭出舊書數種管子後子容手書慶  
厯乙酉家君面付猶蘇河陽所藏也紙尾銘款云惟蘇  
氏世官學以儒何以遺後其在此書非學何立非書何  
習終以不倦聖賢可及其曰書秩銘戒者子容所識其  
曰先公銘戒者銘語亦同蓋子容之子所識也紙背多  
廢牋簡刺字異今制者未云牒件狀如前謹牒如前輩  
所記署銜多杭州官稱子容云知府舍人乃知杭州時

也歸舟煙雨晡霽游大能仁寺閱壯光麗甲於會稽重  
殿複閣金碧相照寺吳越錢氏所建頽廢久矣新於今  
主僧常坦之手二十年前見坦於此寺方為板下僧相  
與步敗簷毀垣間慨然有興作意具道規模次第果不  
愆其素有志者事竟成如此然益知民力之困也 五

日義恩師約飯偕者蘇仁仲伯舅叔舅潘叔度詹季章

丁茂才

松年

七六表弟槩中食開霽晴光發窻心目頗

快飯罷復陰晚步過寺橋歷沈氏李氏園皆荒蕪獨脩

竹猶森然 六日偕石天民 斗文 潘叔度自寺橋直道

過郡庠道傍多流水喬木殊不類廛市教授廳後環碧

亭小愒環亭皆水敗荷折葦秋思甚濃石應之 宗昭 高

應朝 宗商 亦繼來遂自直舍入學夫子殿居中脩廊廣

庭長松錯列講堂榜以明倫後有稽古閣制作皆雄偉

而閣下尤勝疎達開豁擁牆密竹如雲晚冒雨歸 七

日雨不可出過詹季章位小閣因重屋樓板其間縱三

弓橫半之南北取屋山為明遠山竹樹歷歷如畫蘆簟

仰承穹窿若船背幽潔極可愛名以越舫其狀真類小舟也 八日早過大中戒珠寺王右軍故宅也屋多人少頗牢落門有兩池亦稱右軍鵝池墨池畧無意趣政如天章者皆後人彊名之耳殿後地漸峻石應之寓居在焉遂與應之登雪軒軒占卧佛殿右偏湖山聚落皆來獻狀以宜於觀雪得名今雖不與雪值然霧雨空濛亦竒觀也寺後即戴山戴菜名圖經云越王嗜戴嘗採於此 九日早雨少止侍伯舅同潘叔度詹叔章汎舟



赴蘇仁仲飯舟經卧龍山下竹洲柳岸略如苔雪卧杖  
拂水尤奇飯罷登舟中涂小泊步游西園郡圃也其北  
飛蓋堂下臨大池其中集春堂四隅各一亭東春榮西  
秋芳南夏陰北冬瑞其南揚波堂面城水木幽茂兩小  
亭對峙東曰逍遙西曰裴回園之西即曲水先入敷榮  
門右轉至右軍祠穿脩竹塢遂登山山蓋版築所成繚  
繞深邃曲逕回復迷藏亭觀乍入者惶惑不知南北山  
背有流杯巖鑿城引鑑湖為小溪穿巖下鍵以橫閘激

浪怒鳴過閨遂為曲水長廡華敞榱椽柱皆塗斷象  
竹遶以清流甃以蒼石犬牙參錯殆若天成俯砌琢石  
為礮流杯至礮傍輒自近岸蓋廡中為三井吸水勢使  
然曲水之上激湍亭惠風閣規橰若都下王公家山頂  
崇峻庵其脅騁懷亭面亭依山為巖壑然皆塗墍不可  
支久下山右遶至清真軒刻楠象枅欄平堦茶縻架甚  
茂第為蔓草縈亂刺眼耳曲水乃前守史丞相浩所鑿  
往年見其新成今竹樹皆成陰而亭榭稍稍圯剥矣復

登舟還禹跡 十日午後同叔度汎舟過南堰出門穿  
鑑湖支港斜雨入蓬衣袂沾濡七里獨山野橋煙樹可  
畫出山口港漸狹又七里道樹捨舟步田間泥潦沒屐  
一里許至堅密庵拜外大父墓庵屋繞八九間窻檻幽  
潔夜分四山風雨翛然始聞秋聲 十一日晨起冒雨  
躡屐登舟入城至能仁寺赴常坦師飯七六弟在焉遂  
過報恩光孝寺寺後飛來山即圖經所謂怪山也傳云  
自琅邪飛至其說不經其巔有塔采絢甚華塔下有鰻

井乃小石竅自唐以來神之謂鰻能時出祆祥近世不  
復見矣井故依山坳坡陀有古意近僧梵使就整遂無  
可觀濮安懿王祠廟寓此寺有園令領吏卒守之主僧  
明哲往歲嘗識之新昌設蜜朮湯甚清美晚還禹跡  
十二日雨不可出借圖經尋近城名山須雨霽徧游晚  
石應之來宿 十三日過午雨止諸葛壽之十齡高應  
朝石應之孫季和應時約往丁氏園遂同汎舟至新河  
步入園園多海檜但綰結閣其天性後牆皆密竹軒楹

太敞宜夏不宜冬宿東偏小室會宿者叔度應之季和  
十四日自丁氏園偕叔度壽之應朝應之季和登舟出  
五雲門入鑑湖湖面獨此為闊隆興初吳給事帝浚湖  
未一二尺多得古棺皆剝木為之蓋漢末鑿湖前冢墓  
也然後知古人為湖特因地勢築堤堤立而湖成不待  
深疏鑿也今自五雲門重堤隱然達於曹娥五六十里  
民間謂之省塘此乃故湖隄湖田之民每毀堤以決積  
水故堤缺而湖廢異時有意復湖者第脩完省塘則盜

湖之田不待廢而自為陂澤矣自湖尾入若耶溪過後  
漢鄭弘廟傳所記樵風蚤暮迎送舟楫采薪者云至今  
猶然半里石帆山山橫若張帆又數十步秦始皇酒甕  
乃山脚兩石粗類甕盎又一二里艤舟游龍瑞宮方士  
謂之陽明洞天穿松徑數百步至宮宮後三峯翔舞飛  
動勢若覆壓大畧如栖賢望五老特欠其二耳中峯乃  
會稽山祠官春秋用事焉由西廡循山逕觀龍見壇其  
旁即禹穴乃大石中斷成罅殊不古殆非司馬子長所

探也又數步飛來石老木槎牙石壁如削緣磴道至錢  
秀才庵遂自東廡出院院皆扃閉獨遇一客道士云縣  
州人復登舟徑鑑湖湖天夕照水村漁屋皆被光景日  
所入諸山如在金霧中天下絕境也暮泊告成觀宿于  
明遠堂下小室 十五日晨謁大禹祠

入閩錄

淳熙二年三月二十一日早發婺州二十五里馬海廣  
教寺三十里湯塘入衢州龍游縣界十五里宿小龍  
游是日陰潘叔昌實偕行

二十二日十里湖頭三十里龍游縣三十五里宿安仁  
是日陰時見日晚雨

二十三日三十五里衢州謁汪尚書遂館於超化寺哭  
婺倅舅徧到外氏諸位見曹守總聞人伯卿祝汝昭



汝玉張孟遠是日早雨辰後止晚蒸溽未至衢二十里下道數百步有石巖寺巖頗敞然氣象庳陋

二十四日留超化是日雨時作時止見汪監稅築舍人之子也

二十五日早發衢州出通道門三里晉殷將軍浩廟塑像猶作書空狀四里仁尖二里晉殷將軍墓墓在道左無樹林上有小石屋鄉名慶塙舊云殷塙避諱易為慶蓋往者殷將軍故宅塙垣猶存九里十八里市

八里詹家橋八里栢靈橋七里後溪浮橋一里後溪  
市二里入江山縣界土俗穫稻留稈餘束為把藏之  
飯甚有味有以養之故也自此至建皆然二里石龜  
山五里吉溪溪橋頗長有馬驛五里平坦市十五里  
宿白肚屋前溪渚甚勝是日早雨辰止時見日

二十六日五里江山縣五里煙蘿洞洞穴隘甚亂石如  
羊馬其東嶽廟廟後突星山與騎石山相望皆奇峭  
一里東折入仙霞路十里清湖渡渡旁麗坦徐誠叟

書院在焉今為周氏居渡溪即山觀畧有水石十里  
三石山四里長臺路口路通處州四里檀町七里鎮  
安都十五里江郎山三峯拔起數百丈中斷如劃天  
下奇觀也山下靈石廟廟庭老樟輪囷度其圍二丈  
八尺過江下市遊祝氏園見其主人大舉四里宿麥  
嶺自婺至此皆平土過此以往重山複嶺漸類閩中  
是日陰夜大雨

二十七日五里鐵爐岡五里紅橋渡五里長流四里三

坑五里楓嶺十里仙霞嶺磴道屈折數里甚峻左右  
皆童山榛茅極目五里桑園嶺四里梅嶺二嶺間林  
壑頗勝三里礮溪自此路皆並溪時有佳處三里大  
千嶺六里宿柳樹見福州潘進山子嘉十里三石山  
四里長臺路口路通處州四里檀町七里鎮安都市  
十五里江郎山三峯中斷如劃真奇觀也山下靈石  
廟老樟輪囷數百年物過江下市游祝氏園主人名  
大舉四里宿麥嶺自衢至此皆平土過此以往重山

複嶺風物漸類閩中

是日陰夜大雨

二十八日五里相亭自此路皆並溪時有佳處十五里  
小千嶺下嶺半入建寧府浦城縣界五里小楓嶺過  
嶺望浮蓋山甚雄秀石筍石人石鐘石牛羅列其巔  
五里茗坑自此復行驛路五里前漢馮郎中廟蓋馮  
唐也無碑版不知始所以立二里梨嶺其高次於西  
霞三里嘯客墓林麓幽茂四里构木鋪三里回向寺  
十里山坊十里魚梁嶺五里宿沙溪面山臨流水木

清華終夜聞溪聲進士徐良肱來謁

是日晴  
晚雨

前闕非嶺也七里井欄源六里大湖嶺上有靈泉菴

四里大湖市五里西館五里蔡家洋二里清河橋三

里濮村宿過新歸安張丞體仁同年也是日晴邂逅

李將仕兄弟儼俱福州人皆往赴銓試

四月初一日三里轉山頭入五夫路三里陂頭水齧道

多斷絕二里洪源柵五里竹源山徑縈紆澗水交流

聲如怒雷一里梨嶺繚繞五六里所歷諸嶺此為最

高嶺脊崇安縣界下嶺過雙松一兩曲澗石如磴數十級懸瀑甚奇十里溪源橋始至嶺足民家編杉皮障日朴質可喜二里上嵐林巒秀潤小山石瀨點綴曲有思致半里上嵐橋一里上嵐嶺二里會仙橋二里闕嶺二里開善寺七里至五夫訪朱元晦館于書室是日晴

初二日見劉監廟琬充甫劉撫屬珏平甫范仲宣瑄徐

周賓大老闕作恪是日晴

初三日游劉氏園前枕溪後即屏山亭榭高下十餘而悠然堂最勝遂之報本菴菴旁兩崖束溪如峽同游者朱二劉范潘是日晴

初四日游密菴距五夫七里菴乃僧道謙所廬曾大父遺像在焉謙沒餘二十年菴前數十步清湍亭古木四合泉石甚勝繞澗百餘步畫寒亭面瀑布菴亦幽閑晚遂宿菴中同遊者朱二劉范潘徐而劉范徐皆先反是日晴



初五日自密菴歸五夫見王春卿炎朝是日早晴晚雨

初六日 後關

此錄所以紀武夷之游鵝湖之集蓋一時之盛也舊錄散軼求之未獲往嘗得初藁一紙於叔昌丈既刻之矣比復从宋正父自適得此本比前所刊羸七日而猶非全書是可恨也姑再刻以附此卷俟得完本當續補之若斯游之梗槩則見於年譜云

庚子辛丑日記

淳熙七年庚子

正月戊寅

一日甲寅 初編大事記起周敬王三十九年 晴

立春 二日 四十年 陰夜微雨

三日 四十一年 微雷

四日 脩讀詩記唐無衣 陰時見日

五日 四十二年 晴

六日 有杖之杜 葛生 晴

七日 四十三年元王元年 晴暖如中春

八日 采苓 秦車鄰 晴暖甚

九日 二年三年 晴暖

十日 駟鐵 晴暖 未後雷小雨晚陰風

十一日 甲子 四年五年陰時見日午小雨

十二日 小戎 蒹葭 陰薄寒

十三日 六年七年八年 小雨午後晴暖

十四日 終南黃鳥 自四更大雨欲曉漸微 終日

陰風 夜晴

十五日 貞定王元年至五年 晴

十六日 晨風無衣渭陽權輿 晴寒

雨水十七日 貞定王六年至十三年 晴暖

十八日 陳宛丘東門之枌 晴暖

十九日 貞定王十四年至十九年 晴暖

二十日 衡門東門之池東門之楊 晴風

二十一日甲戌 貞定王二十年至二十七年 早小

雨陰

二十二日 墓門防有鵲巢月出株林 陰 午後雨

遂入夜時作時止

二十三日 二十八年至考王九年 陰時見日 極

暖 酉後雨簷溜終夜有聲

二十四日 澤陂檜羔裘 欲曉雨止林塘膏潤畦壠

滲漉 晴

二十五日 十年至十五年 晴 晚風夜寒

二十六日 素冠隰有長楚匪風 晴

二十七日 威烈王元年 晴

二十八日 曹蜴蜴 陰晴不定

二十九日 二年三年 陰

二月己卯大

一日 候人 晴暖

二日甲申 四年 早晴晚陰

鷺鷥三日 鴈鴈 晴和桃杏盛開

四日 五年至八年 晴

五日 下泉豳七月序 自四更雨終日時作時止

六日 九年十年 晴

七日 忌祭 早晴申後微雨

八日 七月一章 微雨

九日 十一年十二年 晴和

十日 七月二章 晴 夜雨

十一日 十三年至十七年 欲曉雨止 紫荊盛開  
鮮明 陰 晚風遂入夜

十二日甲午 七月三章四章 雨寒

十三日 十八年 陰寒時見日 遠山有雪

十四日 七月五章 晴

十五日 十九年至二十二年 早晴已後陰寒

社十六日 七月六章 晴稍和

十七日 三十三年至安王元年 晴和



春分十八日 七月七章 晴午後陰

十九日 二年至四年 晴

二十日 七月卒章 雨暖申後晴 初夜山風愴然

隨以驟雨

二十一日 五年至十年 雨後新綠可觀 晴暖二

更後雷雨

二十二日甲辰 鳴鵲 欲曉雨止辰後復作風寒微

霰北山有雪

二十三日 十一年至十三年 晴寒

二十四日 東山一章 陰寒

二十五日 十四年十五年 晴

二十六日 東山二章 陰寒時見日

二十七日 十六年十七年 陰暖

二十八日 東山三章 晴暖

二十九日 十八年至二十年 晴暖夜雨

三十日 東山卒章 五鼓雨欲曉止時陰時晴蒸溽

三月庚辰大

一日二十一年陰蒸溽

二日甲寅破斧陰寒暖不齊

三日二十二年陰酉後大雨半夜止

清  
明四日伐柯九斨早陰風辰後止

五日二十三年陰早雨辰後止

六日狼跋早雨辰後止陰午後晴

七日二十四年二十五年終日雨

八日 正小雅 晴極暖 綠陰初成

九日 二十六年烈王元年 己後雨午止蒸溽夜雨

連明

十日 鹿鳴 辰後雨昏時止

十一日 二年三年 陰晴不定 寒

十二日 甲子 四牡 陰

十三日 四年五年 陰辰後晴

十四日 皇皇者華 晴 荀生

十五日 六年 晴和

十六日 常棣序 晴和

十七日 晴暖二更後雨 以陸子壽見過輟課

十八日 常棣一章 五更雨驟欲曉止陰晴不定

穀雨十九日 作張十五丈祭文 晴和

二十日 七年 晴

二十一日 常棣二章至四章 雨

二十二日 甲戌 治射圃 晴

二十三日 顯王元年 晴

二十四日 常棣五章至卒章 晴

二十五日 二年 晴

二十六日 伐木一章 晴 初熟

二十七日 伐木二章 晴

二十八日 伐木三章 晴

二十九日 讀宗法 晴 熱晚大風雨昏後止

三十日 讀宗法 陰風濕熱

四月辛巳小

一日 讀宗法 陰 雨時作時止

二日甲申 顯王三年四年 晴

三日 天保序 陰

立四日 五年 自四更雨已後止

五日 天保一章 晴和

六日 六年 清和

七日 天保二章三章 陰時有雨酉後雷雨終夜不

息

八日 七年 早雨辰後晴

九日 天保四章至卒章 早濕熱午雷雨申後晴晚  
復雨中夜止

十日 八年 晴 清和

十一日 采薇一章二章 晴和

十二日 甲午 九年十年 晴

十三日 采薇三章四章 晴和



十四日 十一年晴熱

十五日 讀宗法 陰時見日 濕熱晚微雨

十六日 采薇五章 晴

十七日 十二年 晴熱

十八日 采薇六章 晴午後熱

小十九日 十三年 晴通夕煩暑

二十日 出車一章 雨濕熱晚冷

二十一日 十四年 雨冷

二十二日甲辰 出車二章 晴

二十三日 十五年 晴

二十四日 出車三章 晴

二十五日 十六年 晴

二十六日 出車終篇 晴

二十七日 十七年 晴

二十八日 杖杜一章二章 晴

二十九日 十八年 晴熱

五月壬午大

一日 讀宗法 溽暑雨時作時止

二日 杖杜終篇 雨或作或止

三日甲寅 十九年 陰時見日

四日 魚麗一章 陰二更後雨

五日 二十年 欲曉雨止 陰時見日

芒種六日 魚麗終篇 陰燈後雨遂終夕

七日 二十一年 細雨時見日午後晴

八日 南陔白華華黍由庚申晴熱

九日 二十二年 陰晴不定 濕熱

十日 南有嘉魚一章 晴 夜微雨

十一日 二十三年二十四年 雨時大時小時作時

止

十二日 南有嘉魚終篇崇丘 雨午後止夜小雨頃  
之

十三日甲子 二十五年 晴熱

十四日 南山有臺 辰後雨午止申後復雨簷溜終  
夜有聲

十五日 讀宗法 雨已後止 晚晴

十六日 二十六年 晴和 申後熱

十七日 由儀蓼蕭一章 陰時有雨申後雷雨遂終  
夜

十八日 二十七年 雨不止溪漲晚雨止

十九日 蓼蕭終篇 早復雨晚益大

二十日 作釣臺記 雨晨夜不息

至二十一日 二十八日 雨時作時止申後晴

二十二日 湛露 晴溽暑晚小雨

二十三日甲戌 二十九年 晴熱

二十四日 彤弓 晴熱清風時至晚雷雨昏後止

二十五日 三十年 晴晚小雨即止

二十六日 菁菁者莪 陰晴不定時有微雨溽暑

二十七日 三十一年三十二年 晴熱

二十八日

六月序

早陰涼午後晴熱

二十九日

三十三年

晴熱

三十日

六月一章

早陰涼已後晴熱

六月癸未小

一日

讀宗法

晴時有雲

二日

三十四年

晴熱午後陰涼

三日甲申

六月二章三章

晴時有雲

四日

三十五年

陰昏後雨夜分止

五日 六月四章 雨午後晴

小暑六日 三十六年上 晴熱

七日 六月終篇 晴熱

八日 三十六年下 晴熱晚驟雨即止

九日 采芑一章 晴午時有雨

十日 三十七年 早晴己後陰

十一日 采芑二章 晴時有雲

十二日 三十八年三十九年 陰涼



十三日甲午 采芑三章 陰午小雨時見日

十四日 四十年 薄陰申驟雨

十五日 讀宗法 陰時時雨夜雨

十六日 采芑四章 陰雨涼燠不常

十七日 四十一年至四十三年 晴熱

十八日 車攻一章二章 晴熱申後陰涼

初十九日 四十四年 晴熱  
伏

二十日 車攻三章四章 晴熱甚

大暑二十一日 四十五年四十六年 晴熱

二十二日 車攻五章六章 晴熱

二十三日甲辰 四十七年 晴熱極

二十四日 車攻終篇 晴熱午有雷

二十五日 四十八年慎靚王元年 晴熱申後雷震

陰晦小雨即霽

二十六日 閏

二十七日 二年三年 晴熱

二十八日 吉日終篇 晴熱 晚小雨

中  
伏二十九日 四年 晴熱

七月甲申大

一日 讀宗法 晴極熱

二日 鴻鴈 晴熱

三日 五年 晴熱晚大雷雨有雹燈後止

四日甲寅 庭燎 晴熱夜風雨久之

五日 六年 晴熱晚大風雨

六日 沔水 晴熱

立七日 赧王元年 晴熱

八日 鶴鳴 晴熱

九日 二年 晴極熱

未十日 祈父 晴熱

十一日 三年上 晴熱

十二日 白駒 晴熱

十三日 三年下 晴熱

十四日甲子 黃鳥 晴時有雲微涼

十五日 讀宗法 晴熱夜稍涼

十六日 四年 晴熱早晚涼酉後驟雨

十七日 我行其野 晴熱

十八日 五年 晴熱

十九日 斯十一章二章 晴極熱

二十日 六年 晴熱

二十一日 斯十三章至五章 晴熱

二十二日 七年 晴熱

處暑 二十三日 斯干六章七章 晴熱

二十四日甲戌 八年上 晴熱

二十五日 斯干終篇 晴熱

二十六日 八年下 晴熱

二十七日 無羊一章二章 晴熱

二十八日 除期服 晴熱

二十九日 九年 陰申後雨簷溜有聲食頃止夜時

有雨

三十日 無羊終篇 沉陰晚時小雨

八月乙酉小

一日 讀宗法 陰

二日 十年上 晴新涼

三日 節南山一章二章 晴

四日甲申 十年下 陰微雨四更後稍大

五日 節南山三章四章 雨或大或小

六日 十一年 晴時有雲

七日 節南山五章至七章 晴

白露八日 十二年十三年 晴熱

九日 節南山終篇 晴風

十日 十四年 晴

十一日 正月一章至三章 陰

十二日 十五年 晴時有雲

十三日 正月四章至六章 晴



十四日甲午 十六年 晴

十五日 讀宗法 晴

十六日 正月七章至九章 晴

十七日 十七年 晴

十八日 正月十章 晴時有雲

十九日 十八年 陰晚微雨

二十日 正月終篇 陰晚小雨二更後遂大通夕簷

溜有聲

二十一日 十九年 雨時作時止

二十二日 十月之交一章二章 陰夜雨

秋分二十三日 二十年二十一年 雨時作時止

二十四日甲辰 十月之交三章四章 申後大雨遂

終夜

二十五日 二十二年二十三年 辰後雨止午後晴

二十六日 十月之交五章六章 晴

二十七日 二十四年二十五年 晴

社二十八日 十月之交終篇 晴

二十九日 二十六年 晴 木犀盛開芙蓉初發

九月丙戌大

一日 閱醫經 雨終日夜

二日 雨無正一章二章三章 陰

三日 二十七年 雨終日夜

四日 雨無正四章五章 雨辰後止陰時見日

五日甲寅 二十八年 晴

六日 雨無正終篇 晴

七日 二十九年 晴

八日 小旻一章 晴

露寒九日 三十年 晴 夜分雨

十日 小旻二章 欲曉雨止 陰

十一日 三十一年 晴

十二日 小旻三章 晴

十三日 三十二年 晴

十四日 小旻四章 晴

十五日甲子 讀醫經 晴

十六日 三十三年三十四年 晴

十七日 小旻終篇 晴

十八日 三十五年三十六年 晴

十九日 小宛一章至三章 陰冷

二十日 三十七年三十八年 晴

二十一日 小宛終篇 晴

二十二日 三十九年四十年 陰

二十三日 小弁一章二章 雨申後晴夜雨

二十四日 四十一年四十二年 晴晚小雨

霜降二十五日甲戌 小弁三章四章 自五更雨已後

止夜雨

二十六日 四十三年至四十六年 陰風

二十七日 小弁五六七章 陰時見日

二十八日 四十七年至五十年 晴

二十九日 小弁終篇 晴

三十日 五十一年至五十四年 晴暖菊花盛開終

夜風

十月丁亥小

一日 作書辭官 晴

二日 巧言一章 晴

三日 五十五年 晴

四日 巧言二章 晴

五日甲申 五十六年 晴稍暖

六日 巧言三章 晴 黃花如散金

七日 五十七年 陰

八日 巧言四章 晴 庭有落葉

九日 五十八年五十九年 晴

立冬十日 巧言終篇 晴

十一日 秦昭王三十二年至五十五年 陰

十二日 何人斯一章至四章 陰



十三日 五十六年孝文王元年 早畧見日沉陰夜

月明

十四日 何人斯終篇 晴

十五日甲午 閱醫經 晴

十六日 莊襄王元年至始皇元年 晴

十七日 巷伯一章至四章 晴

十八日 二年至五年 晴暖

十九日 巷伯終篇 晴暖

二十日 六年至九年 晴暖

二十一日 谷風 陰時見日昏小雨

二十二日 十年至十三年 晴暖

二十三日 蓼莪一二三章 晴暖

二十四日 十四年至十七年 自五更小雨時作時

止

小雪 二十五日甲辰 蓼莪四章 晴

二十六日 十八年至二十一年 陰

二十七日 蓼莪終篇 自昨夜雨時作時止 設園

爐 反照

二十八日 二十二年至二十五年 晴微霜

二十九日 大東一章二章 晴晡後冷

十一月戊子大

一日 忌祭 晴寒 辰後陰

二日 二十六年 晴寒

三日 大東三章 晴

四日 二十七年 晴

五日 大東四章五章 晴暖

六日 甲寅 二十八年至三十三年 晴暖

七日 大東終篇 小雨陰晦夜雨

八日 三十四年至三十七年 小雨晚晴

九日 四月一章二章 晴

十日 二世元年 晴

大  
雪  
十一日 二世二年 晴暖

十二日 二世三年 陰雨遂終夜

十三日 義帝元年 苦寒陰晦有雪片

十四日 漢高帝二年 陰寒

十五日 三年四年 晴寒

十六日 甲子 四月三章四章 晴寒

十七日 四月五章 晴

十八日 四月六章 晴

十九日 四月終篇 晴暖

二十日 北山一章二章 晴暖

二十一日 北山終篇 陰酉微雨

二十二日 閱祭禮 陰

二十三日 閱祭禮 陰

二十四日 閱祭禮 陰微雨

二十五日 閱祭禮 晴

冬至二十六日甲戌 家廟成時祭 補大事記霜晴晨

光蔥朧風氣清澈

二十七日 無將大車 霜晴風寒

二十八日 補記 霜晴

二十九日 小明一章 霜晴

三十日 補記 晴寒

十二月己丑小

一日 讀宗法 晴寒

二日 小明二章 晴寒

三日 補記 晴寒

四日 小明三章 晴寒

五日 補記 晴

六日 甲申 小明四章 晴頗暖

七日 補記 晴

八日 小明卒章 晴寒

九日 補記 晴

十日 鼓鐘

十一日 補記 晴寒



寒小十二日 楚茨一章 晴寒

十三日 補記 晴寒

十四日 楚茨二章 陰寒

十五日 補記 晴寒

十六日甲午 楚茨三章 晴寒

十七日 補記 晴寒

十八日 楚茨四章

十九日 補記 晴寒

臘  
二十日 楚茨終篇 晴寒

二十一日 補記 晴寒

二十二日 信南山一章二章 晴寒

二十三日 補記 晴寒

二十四日 信南山三章四章 晴

二十五日 補記 晴

二十六日甲辰 信南山終篇 晴

大寒  
二十七日 補記 晴

二十八日 補記 晴

二十九日 補記 晴寒

淳熙八年辛丑

正月庚寅大

一日戊申 讀論語 晴寒

二日 甫田一章 晴寒

三日 漢高帝五年上 陰微飄雪

四日 甫田一章 自昨夜大雪林麓欄檻高下一色

辰後止

五日 五年下 陰晦時有雨 夜雪

六日 甫田三章 早雪止藏雪中後雪復作晚止

七日甲寅 六年上 陰晴不定

八日 甫田終篇 陰晦晚大雪遂入夜

九日 六年下 早雪止琳琅觸目 陰

十日 大田一章 晴瓦溝餘白臘梅盛開

十一日 七年 霜晴已後陰

十二日 大田二章 陰寒

立  
春 十三日 八年 陰時見日

十四日 大田終篇 晴時有雲

十五日 閱歐陽公集 晴風

十六日 九年 晴風

十七日甲子 瞻彼洛矣一章 晴

十八日 十年上 晴

十九日 瞻彼洛矣終篇 晴

二十日 十年下 日烘臘梅香甚

二十一日 裳裳者華序 晴 夜大風

二十二日 十一年上 陰風

二十三日 裳裳者華 晴

二十四日 十一年中 晴 夜小雨

二十五日 桑扈 晴和夜風

二十六日 十一年下 陰寒

水雨 二十七日甲戌 鴛鴦 陰

二十八日 十二年上 陰寒時時小雨

二十九日 雨水冰 頽弁一章 午後雪終夜不止

三十日 十二年下 早晴申後雪遂終夕

二月辛卯小

一日 頽弁二章 大雪晚小止復作

二日 惠帝元年二年 大雪日夜不息

三日 頽弁三章 大雪日夜不息

四日 三年四年 早雪止未後晴

五日 車牽一章至三章 陰晴不定

六日 五年六年 輕陰 餘雪可觀

七日甲申 忌祭 晴

八日 七年高后元年 晴

九日 車牽終篇 晴 園梅盛開

十日 二年三年

十一日 青蠅 陰晴不定 夜小雨

十二日 四年五年 細雨時作時止



十三日 賓之初筵一章 陰晚晴

十四日 六年七年 晴和

十五日 讀論語 晴和晚大風

十六日 八年上 晴和紅梅開

十七日 甲午 賓之初筵二章 晴暖

十八日 八年中 陰暖甚晚小雨

十九日 作番陽王安母墓表 欲曉大風雨終日滂

淹晚晴

二十日 八年下 晴

社 二十一日 賓之初筵三章 陰時有雨

二十二日 文帝元年 晴

二十三日 賓之初筵四章 霜寒晴櫻桃花開

二十四日 補記 晴杏花開聞春禽

二十五日 賓之初筵卒章 晴和

二十六日 補記 晴和 桃花開

二十七日甲辰 致齋 晴風時有雲

二十八日 時祭 陰午後晴雜花多開晚雷雨遂入  
夜

春分二十九日 補記 陰雨

三月壬辰大

一日 讀宗法 晴 紫荊花開 晚雨

二日 二年上 晴

三日 魚藻 晴

四日 二年中 晴

五日 采菽一章 或晴或陰夜小雨

六日 二年下 陰

七日 采菽二章 陰雨

八日甲寅 諸葛誠之行輟課 陰雨夜晴

九日 采菽三章 晴寒 李花開

十日 三年 陰晚雨

十一日 采菽終篇 陰雨

十二日 四年五年 陰雨

十三日 角弓一章至四章 陰時見日

十四日 六年 晴暖 海棠梨花盛開 夜雨

清  
明 十五日 讀知言 陰晚小雨

十六日 七年 晴時有雲

十七日 角弓五章六章 晴 聞蛙

十八日 甲子 八年 早晴辰後陰雨遂終夜

十九日 角弓終篇 陰雨

二十日 九年十年 晴夜小雨

二十一日 菀柳 或陰或晴

二十二日 十一年上 晴漸熱綠陰初成夜雨

二十三日 都人士序 陰時有雨午後雨益大遂終

夜

二十四日 十一年下 晴

二十五日 都人士一章 晴 真珠花開

二十六日 十二年 晴 百葉桃開

二十七日 都人士二章 晴

二十八日甲戌 十三年 陰雨

二十九日 都人士終篇 陰雨時見日

穀雨 三十日 十四年 晴 竹間蕙開

閏三月小

一日 閱醫經 晴 茶蘼薔薇開

二日 十五年 陰晚晴 紫竹筍生 聞子規

三日 采綠 陰 午後雨遂終夜

四日 十六年 細雨

五日 黍苗 陰 作茶麋架

六日 後元年 陰種蓼花時見日筋竹笋生晚雨遂

終夜

七日 隰桑 雨

八日 甲申 後二年 晴濕熱

九日 白華一章二章 陰 種芭蕉

十日 後三年四年 雨晚晴夜復雨

十一日 白華三章四章 或陰或晴



十二日 後五年 晴夜雨 聞鶯

十三日 作邵武游玠母墓誌 晴

十四日 後六年 乍雨乍晴

立夏十五日 閱醫經 晴時有雨

十六日 後七年 輕雷小雨

十七日 白華五章六章 陰小雨

十八日甲午 景帝元年 陰時見日

十九日 白華終篇 陰 新荷生

二十日 二年上 晴時有雲

二十一日 縣蠻序 陰時見日

二十二日 二年下 陰晴不定小雨

二十三日 縣蠻 陰時見日

二十四日 三年上 晴初熱

二十五日 瓠葉 晴 除圍爐

二十六日 三年中 晴熱夜雨

二十七日 漸漸之石 終日雨

二十八日甲辰 與范元章黃英甫諸人會飯輟課晴  
熱

二十九日 黃幾先行輟課 晴熱

四月癸巳大

一日 讀正蒙 陰時有雨

滿小二日 三年下 晴極熱

三日 茗之華 晴熱夜大雨

四日 補記 雨午後止

五日 何草不黃 陰晚雨

六日 補記 時時雨

七日 文王序 陰夜雨

八日 補記 晴夜雨

九日 甲寅 文王一章二章 陰夜雨

十日 補記 大雨如傾

十一日 文王三章四章 晴晚陰

十二日 四年 陰時時雨濕熱

十三日 文王五章 晴

十四日 五年六年 晴熱 蜀葵開

十五日 閱醫經 晴午微雨

十六日 七年中元年 晴開東窗

芒種十七日 文王終篇 陰

十八日 中二年上 陰雨夜大雨

十九日甲子 大明一章 陰時有雨

二十日 中二年中 晴

二十一日 大明二章 或陰或晴

二十二日 中二年下 早大雨已止未後晴

二十三日 大明三章 晴

二十四日 中三年 早晴辰後陰 涼

二十五日 大明四章 陰時時雨

二十六日 中四年五年 雨

二十七日 大明五章六章 雨

二十八日 中六年後元年 大雨如傾遂終夜 萱

草開

二十九日甲戌 大明終篇 早雨辰止午復雨

三十日 林伯和來輟課

五月甲午大

一日 讀論語 大雨 致齋

夏至二日 時祭 早雨止辰後復作遂終夜

三日 縣一章 陰時時雨

四日 後二年三年武帝建元元年 快晴

五日 縣二章 晴末後雷雨 治藥

六日 綿三四五章 晴熱

七日 綿六章 晴熱

八日 建元二年三年 晴午後小雨

九日甲申 縣七章 晴已後陰

十日 建元四年五年 終日雨

十一日 縣八章 大雨

十二日 建元六年 雨



十三日 縣卒章大雨

十四日 元光元年二年 陰雨夜月明

十五日 讀易 辰後日出晚雷雨

十六日 元光三年 晴濕熱

小暑十七日 棧樸 晴晚小雨

十八日 元光四年 晴熱晚雨

十九日甲午 旱麓一二三章 晴熱

二十日 元光五年 晴 舶趨風至

二十一日 旱麓終篇 晴熱

二十二日 元光六年 晴熱

二十三日 思齊一章 晴熱

二十四日 陳正已行輟課 晴熱

初伏二十五日 思齊二章三章 晴熱

二十六日 元朔元年 晴熱

二十七日 思齊終篇 晴熱

二十八日 元朔二年 晴熱

二十九日甲辰 皇矣一章 晴熱

三十日 元朔三年四年 晴熱 夜大熱

六月乙未小

一日 讀近思錄 晴大熱

大暑二日 元朔五年 晴熱 黃葵開

三日 皇矣二章 晴熱

四日 元朔六年 晴熱

中伏五日 皇矣三四章 晴熱 申風雷微雨飄洒 秋

蟲鳴

六日 元狩元年 晴熱 晚薄雲小雨

七日 皇矣五六章 晴熱

八日 元狩二年三年 晴熱 晚雨簷溜有聲食頃

止

九日甲寅 皇矣終篇 晴大熱 池蓮始開 夜驟

雨頃之

十日 元狩四年 晴熱

十一日 靈臺一二三章 晴熱

十二日 元狩五年 晴熱 蓼花開

十三日 靈臺終篇 晴熱夜尤熱

十四日 元狩六年元鼎元年 早驟雨終日陰夜月

明

十五日 讀近思錄 晴時有風

十六日 元鼎二年三年 晴熱

十七日 下武 朝霞晴熱

立秋十八日 元鼎四年 晴熱

十九日甲子 文王有聲一二章 晴熱

二十日 元鼎五年 早陰已後晴

二十一日 文王有聲三四章 欲曉驟雨頃之終日

陰昏後小雨

二十二日 元鼎六年 晴熱

二十三日 文王有聲終篇 晴大熱

二十四日 元封元年 晴熱晚驟雨虹見

二十五日 生民一章 晴熱

二十六日 元封二年三年 晴熱

二十七日 生民二三章 晴熱

二十八日 元封四年五年 晴熱

二十九日 甲戌 生民四章 晴熱午後小雨

七月丙申大

一日 讀論語 晴熱

二日 元封六年太初元年二年 晴熱

三日 生民五章 晴熱

四日 太初三年四年天漢元年 晴熱

五日 生民六章 晴熱

六日 天漢二年至征和元年 晴熱

七日 生民七章 晴熱虹見小雨

八日 征和二年三年 晴午後陰小雨

九日 生民終篇 自五更大風陰午後時時小雨

十日甲申 補記十一年 晴午小雨



十一日 行葦一二三章 晴時有雲 步月墻東水

竹幽茂

十二日 補記十三年 晴熱

十三日 行葦四五章 晴熱

十四日 補記十七年 晴熱

十五日 讀書經 晴熱

十六日 補記十年 晴熱

十七日 行葦終篇 晴熱

十八日 補記二十三年 晴熱 豆花開

十九日 既醉一二三四章 晴熱

二十日甲午 補記一年 早涼晴初夜小雨

二十一日 既醉終篇 陰午後雨久之

二十二日 補記十一年 陰涼

二十三日 鳬鷺 陰時時雨秋意翛然木芙蓉開

二十四日 補記一年 晴早晚涼午熱

二十五日 假樂 晴

二十六日

補記二年 晴晚陰

二十七日


公劉一章 陰

二十八日

觀伯恭病中日記其繙閱論著固不以一日懈  
至於氣候之暄涼草木之榮悴亦必謹焉則其  
察物之勤蓋有非血氣所能移者矣比來不得  
復見伯恭固為深恨然於此得竊窺其學力之  
所至以自警省則吾伯恭之不亡者其誨我亦

誨誨矣三復汨涕敬書其後云淳熙壬寅新安

朱熹



東萊集卷十五